

MIRO VILLAR

## *Mar de rostros*

### 1. «MARCOS»

Mar de rostro, mar serio, mar revolto cabelo,  
mar cos brazos abertos para o coñecemento,  
onde a penas existen feridas que se esquecen  
na música da agulla do compás que é o tempo.  
Mar revolto cabelo, mar serio, mar de rostro.

### 2. «PÓLVERA»

No mar medran froiteiras e as mans do mariñeiro,  
mans de ferro, con fendas salgadas do traballo,  
collen xurelos de ollos cegos e escamas tona  
de prata, que reloce en cestos de esperanza;  
mentres o home interroga xa o día de mañá.

### 3. «ATILA»

Tanque de gasolina na man, con esa maxia  
que fai do combustible un líquido amniótico,  
o mariñeiro observa como a embarcación  
se converte decote nun incipiente embrión,  
símbolo de futuro, sinal de vida nova.

### 4. «TARITO»

O mariñeiro, escravo do mar, é o gladiador  
de hoxe, pelexa en circos de argazo, anfiteatros  
son os acantilados e o César é Neptuno.  
O seu combate é sempre desigual contra a morte  
por máis que no seu peito lle medre unha man branca.

### 5. «NUNO»

Dos catro ríos de Hades, do inferno mitolóxico,  
corre máis falsidade polas veas do Océano,  
pois pode recibirte co sorriso nos labios  
mentres pensa un veneno para a túa alegría,  
por iso nunca, nunca lle leves agasallos.

### 6. «LINDO»

Roubáronnos o vento pero aínda podemos  
atravesar a vida con vogas e ceavogas  
de remos, porque os brazos coñecen a afouteza  
e ningunha tormenta rebenta o noso peito,  
enorme de certezas, xigante de ilusión.